

12 MAR 2000

Umno-Calon

MAHATHIR DAN ABDULLAH TERUS DAPAT PENCALONAN

KUALA LUMPUR, 12 Mac (Bernama) -- Datuk Seri Dr Mahathir Mohamad dan Datuk Seri Abdullah Ahmad Badawi setakat ini memperolehi 46 pencalonan masing-masing untuk jawatan presiden dan timbalan presiden bagi pemilihan Umno Mei ini.

Masing-masing menambah 25 pencalonan daripada bahagian-bahagian Umno yang mengadakan persidangan perwakilan hari ini.

Ini bermakna, Abdullah, yang memerlukan 33 pencalonan untuk bertanding, telah melayakkan diri.

Dr Mahathir memerlukan 50 pencalonan untuk melayakkannya bertanding mengekalkan jawatannya sebagai presiden parti.

Sementara itu, Ketua Badan Perhubungan Umno Kelantan Tengku Razaleigh Hamzah setakat ini belum menerima pencalonan baru untuk jawatan presiden dan timbalan presiden parti, untuk menambah satu pencalonan untuk kedua-dua jawatan itu yang diterimanya sebelum ini.

Bagi jawatan naib presiden, Datuk Seri Najib Tun Razak terus mendahului calon-calon lain apabila beliau menerima 23 lagi pencalonan untuk menjadikan 44 bilangan pencalonan yang diperolehinya.

Untuk jawatan itu, seseorang perlu menerima 17 pencalonan untuk bertanding Mei ini.

Yang turut melayakkan diri ialah Datuk Abdul Ghani Othman yang setakat ini menerima 29 pencalonan.

Bagi jawatan ketua pergerakan pemuda Umno, Datuk Hishammuddin Tun Hussein setakat ini menambah 10 pencalonan untuk menjadikan jumlah keseluruhan 70. Untuk layak bertanding jawatan itu sebanyak 33 pencalonan diperlukan.

Datuk Abdul Aziz Sheikh Fadzir mendahului pencalonan bagi naib ketua Pemuda dengan 55 pencalonan dan beliau diikuti Zein Isma Ismail (12) dan Mustapha Khalid (3).

Untuk Ketua Wanita Umno, Datuk Seri Rafidah Aziz mendahului penyandang jawatan Datuk Dr Siti Zaharah Sulaiman dengan 38 pencalonan berbanding 26 yang diperolehi Siti Zaharah, manakala bagi jawatan naib ketua Wanita, Datuk Shahrizat Abdul Jalil mendapat 38 pencalonan berbanding Ainon Khariyah (18) dan Datuk Napsiah Omar (7).

-- BERNAMA

mam akt RI